


漁
墅
類
稿



漁

野

類

稿

四庫全書珍本初集

別集

集

類部

欽定四庫全書 集部四

提要

漁墅類稿八卷 別集類三 宋

臣等謹案漁墅類稿八卷宋陳元晉撰元晉

宋史無傳惟江西通志載其字明父崇仁人

登嘉定四年進士初授雲都尉遷知福州融

州累官邕管安撫使嘗建漁墅書院因以名

集然考趙汭東山存稿有虞集行狀稱集之

祖解組過臨川寓公陳元晉之夫人為其女
弟因迎以歸則元晉亦蜀人僑居崇仁通志
尚考之未詳也焦竑經籍志載有元晉漁墅
類稿十卷諸家悉不著錄今檢永樂大典中
尚存雜文八十餘首各體詩一百一十餘首
謹以類編緝釐為八卷江西志稱元晉嗜學
好義為德于鄉人者甚多歷官所至俱著政
績今觀集中如乞差甲首催科劄子則極論當

時賦役之弊上曾知院書則力陳上流防江
之策且謂天下非事功難立之為憂而人心
不睦之可畏又謂邊遽戒嚴則號召郡國不
教之卒坐糜粟于長江以南謂之防江警報
遠則散遣解弛又復置之度外自開禧以
來同一痼病其于南宋廢弛聚訟之象指陳
痛切可謂深中膏肓又上魏了翁啟有云善
類之勢不振付之乍佞乍賢正論之脉僅存

聽其自鳴自息以奔趨為捷徑以軟熟為圓
機習成脂韋病入骨髓皆憤世嫉俗之言則
知其生平必以伉直不諧于時者讀其遺文
猶可以見其人也乾隆四十六年九月恭校
上

總纂官臣紀昀臣陸錫熊臣孫士毅

總校官臣陸費墀

欽定四庫全書

漁墅類稿卷一

宋 陳元晉 撰

劄子

乞差甲首催科劄子

臣竊觀江西差役之弊中產之家以戶長破家者相踵
蓋里正號為大役而易戶長號為小役而難名大而實
易則以盜賊煙火之事不常有名小而實難則以催科
督迫之擾頃刻不得免也易者任之大家難者任之中

金定四庫全書
卷一
產甚者狹鄉之中有不贏百錢之稅而應充者有不滿
兩三年而再及者其人丁少則耕殖荒于犇命之勤其
氣勢輕則追呼不能以令豪強之族展限代輸費用亡
藝比較笞箠怨嗟流聞蓋執役既畢其資產亦與之俱
罄矣不急揀之更十數年冰消火燎豈復有可全之下
戶哉臣愚嘗思所以揀之之術惟曩者浙東提舉索說
友已行之策有當推行于江之西者其法攢聚一鄉之稅
數上者二十戶下者三十戶隨輸送之相等居止之附

近以類相從各為一籍分為甲首責以拘催若其本名合輸之數如限納足則從甲而乙遞相授受至籍尾而止其承籍之家惟恐舍去之不亟則必以時輸納故期限易了而胥吏無所誅求賦租易集而官府免于比較無爭役之訟無執役之擾官民兩便未有易此臣愚欲望睿慈降付都省參詳行下江西提舉司照臣所請施行若其委蛇曲折窒民姦求民便者俾之從長劑量第向來浙東不無小弊則以逃亡死絕產去稅存之戶無

所追索官司不為從實銷豁一例籍之人不免代輸胥
吏常以此為邀賂之地合委監司檢察若有此等許令
越訴官吏並以違制論懲一足以戒百矣是法苟行一
道中產之民得以生長如天之仁實非小惠

乞換雩都武尉劄子

縣之有尉與令等故初授而銓量終更而批書視丞簿
為加詳蓋一縣獄訟之大者爭訟則有定驗盜賊則有
追捕殺傷則有檢證皆倚辦于尉惟是贛之諸邑訟事

尤繁故尉之職尤不容以輕授其間十縣有二員並置
文尉者贛縣瑞金會昌是也有一文一武者寧都興國
是也獨員文尉者石城信豐龍南安遠是也雩都號壯
縣民頑地廣爭訟盜賊殺傷之事視他邑數倍乃獨置
一尉又以注右選之士近攷數任來尉雩都者多出于
軍班之內與武人之門蔭徃徃于遠方民情利病全不
諳曉一切受成吏手謹書紙尾而已甚者不識姓字託
書判于他人唯知恃麤豪以虐使其下肆掇擾以求厭

其欲邑之滯訟不得而決逋寇不得而獲寃獄不得而直徃徃繇此欲乞睿慈將雩都縣尉窠缺檢照守臣費堦所請撫州樂安縣體例改作員缺注授選人却于見任縣尉某人改本等差遣庶幾邑尉得一文臣協贊邑事獄訟不至失平實為荒遠之幸

代奏事劄子

臣一違軒陛兩玷麾符積媿素餐淺聞報効蒙恩奏事再覲清光日夜以思惟當罄竭千一之愚庶幾補報涓

埃之末敢冒昧以所聞為陛下言之臣聞人心者事功之地也故天下非事功難立之為憂而人心不睦之為可畏苟其睦也雖艱難多事之際而無小無大氣勢聯合自無支吾不及之患否則雖處安平無事之際而或前或却意向乖張已有齟齬難安之形周盛時有昆夷獫狁之侵而恃以為攘却之本者今天保以上之詩是也夷攷其詩乃皆詠寫其君臣和樂之情而曾不及兵戎守備之事蓋情意之浹洽血脈之流通則始之圖揆

終之酬酢內外上下如手足心膂之運不相期而相應顧何事之不可為哉故晉不失備而加以睦識者知其能以國霸夫差善用其民子西不以為患而惟患二三子之不相睦天下猶一家也亦安有一家之內人自為謀心各有主彼此之不相能而能禦隣里之窺覷杜盜賊之侵凌者耶夫議論一于上而後下之所視以趨向者定心力協于內而後外之所以捍禦者堅竊迹近事任事論事意見病于背馳謀國憂國言論幾于乖刺主戰

者難合于和而在邊者勿諧于庭是未可以言睦也趨
向何由而定哉制閫與餉司之意異而進退觀望之莫
決列將視中權之令輕而號召調發之不行前邀後擊
之不相援而城自為守大軍民兵之兩相忌而人自為
戰是不可以言睦也捍禦何由而堅哉夫人心不能以
兩用不用之公則用之私始于議論之不一而終于黨
與之角立始于心力之不協而終于釁隙之橫生則如
師曠所謂不心競而力爭私欲侈而公議廢矣雖陛下

竭宵衣旰食之勤是自為焦勞而已大臣勵鞠躬盡瘁
之操是自為勉強而已非所以服姦雄之心也非所以
聳遐荒之聽也事功悠悠亦復奚怪急解而更張之猶
有及乎臣愚區區竊謂謀論異同翕受無間而折衷以
是非之公則議論不患其不一託重閭寄情實必孚而
警厲以賞罰之公則心力不患其不協使上下之心一
主于公求以相濟而不求以相勝庶幾可以言睦而應
敵之方可得而議矣家國一體也公私一理也未有國

之不安而能有其家者也亦未有公之不濟而能保其私者也呂範言于孫策曰今日之事譬如涉海一事不勞俱受其敗此所以為範計非但將軍也今之充滿于班行奔走于邊圉者誰獨無呂範之心哉亦在陛下與二三大臣意氣之所感動而已是豈以不睦為患哉惟陛下留意

代奏劄

臣聞先朝范鎮之言曰欲備契丹莫若寬河東河北之

民備靈夏莫若寬關陝之民備雲南莫若寬湖嶺川峽
之民備四海莫若寬天下之民鎮之此言蓋至和間所
奏請也是時中國之勢全安而無隙西北之國帖息而
聽命而鎮首以寬民力為言蓋護養元氣于四支強壯
之日是則忠臣醫國之至計也矧夫外之酬應方艱而
內之敗缺不掩使非有以養其氣力之渾厚結其心志
之忠愛其何以杜窺覷而銷間隙支緩急而應事變哉
人之常情逐其利而不暇計其害故貪利于邊陲者多

失備于姦宄蓋盧循之事是已有所泄則有所忘故備
重于西北者多兆變于東南蓋黃巢之事是已故聖人
當多事之際非能事事而逆為之備也亦恃其有以得
斯民之心而已非能人人而有所予也亦惟有以寬斯
民之力而已其力既紓則其心有所繫矣其心有所繫
則其所以為備者至矣自昔竭民之力失民之心其蠹
有二曰盜臣曰聚斂之臣盜臣志于奉已聚斂之臣志
于奉國奉國者非奉已之比然為根本之害則一仰惟

陛下仁心發于天性仁聞孚于寰海視匹夫之失所如一已之隱憂戎兵跳梁兵以應動臣知聖心益有甚不得已焉者收輯流散撫摩瘡痍恩詔丁寧德意劬密寬三邊之民為三邊之備者亦既闕聖慮矣然臣觀內而郡邑之間歲事薦豐穀價甚賤而田野焦然愁恨歎息猶聞于耳大義感動人宜奮發而羽檄一聞駢首聚議若旦夕感之于無聊賴者此其故何耶安平無事取極錙銖軍興旁緣更求趣辦諸州椿積稍歸于上有所支

遣必以不足病其民和糴頻年民無餘粟一或緩急其
何恃以為之備開姦人告訐之門而科罰錯出幸富家
罣誤之失而佔籍株連弓兵絡繹于郊原計臣恣橫于
井邑求為辦事無復惠心甚至取苗斛概量之贏覈田
畝隱占之數常賦足而復輸號曰備助軍須名曰和買
其實科抑或以奉國而取能名或以奉已而厭私欲借
使博施濟衆之心日勤于上而下之奉令承教者不滿
人意如此欲天下之寬難矣夫斯民尊君親上之誠常

生於養生無憾之際使其迫感不自安則無聊之心生矣後繭絲而先保障則沈竈產龜而民無叛志不然間架陌錢之除姦人將得以藉口海內又安固未必遽有是事識者慮微要不可謂無是理使鎮生此時其不為之寒心耶臣愚欲望陛下濬發德音明戒郡縣繼自今日凡旁緣之苛斂與虐取之巧名一切掎克之說禁勿復行又申嚴賦吏之法俾無得借公以濟其私庶幾仁意流行人心固結導迎善氣消遏亂原皆自此始實非

小補惟陛下裁察幸甚

表

賀皇帝表

天意右仁克相慈闈之壽聖心廣孝於昭寶冊之徽朝
野歡呼神人閭懌恭惟皇帝陛下家邦勤儉宮廟肅雍
盡人倫之常邁夔夔之虞舜全天性之樂配翼翼之周
文欽承長樂之懽祇奉昕庭之冊起敬起愛美欲報以
奚彈得壽得名慶用垂于罔極臣心存戀闕迹阻班庭

揚偉績而鋪闋休擬請封于東岱綏眉壽而介繁祉知
永燕于西崑

賀皇太后表二首

位正中闈誕敷顯冊尊居慈極昭嗣徽音凡圃載持惟
時歡忭恭惟皇太后陛下宅心淵靜秉德齊莊大明行
黃道之天功高佑辟內治本青蒲之地憂切進賢嘉相
闋之鍾飶儷宸居而作配貽謀有永受福無疆臣欣覩
鴻儀莫陪虎拜介以繁祉但揚壽母之休祝之多男願

衍文孫之慶

六月徂征誕揚我武三城遄復不失故疆喜溢兩宮歡
騰四表恭惟皇太后陛下功齊太極德並坤元怡怡愉
愉子孝極親歡之盡雖雖肅肅家齊卜天下之平奏此
膚公福于王母某隃驅牡轡阻蓮駕行頌天子之萬年
欣際平淮之運奉太后于億載願廣長樂之詩

賀皇太后加上尊號表

長樂頤神有開燕喜昕庭晉冊增衍鴻名八表均歡六

宮溢喜恭惟皇太后陛下補天功大配地德深物仰廣
生顯仁心之持載年登希有侈富履之康寧方續迓于
湛祺爰推崇于熙號奉觴稱慶龍章聯禴翟之輝鏤玉
傳徽虹氣粲盤螭之飾誕揚盛典允屬明時臣逖阻觀
風莫陪展采既多受祉敢揚文母之休於萬斯年請上
堯封之祝

賀皇帝冊后表

風自火出示端本于家人月並日明表儷尊于宸極宗

祧有慶寓縣均歡竊稽古之盛時有思齊之具美任氏
妣氏全母慈婦順之規周南召南成家齊國治之效掩
五三而獨出幸千一之親逢恭惟皇帝陛下盛德巍巍
小心翼翼問安侍膳躬行曾閔之難養志承顏思得塗
莘之助恪遵慈訓式嗣徽音播顯冊于明廷下孚民聽
奉壽卮于長樂上格親歡綿延百世之休根本四方之
化臣服勤馳隄阻迹班庭刑于妻而御家邦願宣美教
登爾士而從孫子擬頌鴻禧

金定四庫全書
卷一
賀皇后受冊表

位正坤儀有衍長秋之慶庭揚渙號聿新諸夏之瞻朝
野均歡宮闈底豫恭惟皇后殿下祥鍾沙麓德邁河洲
夙夜相成綽著賢妃之譽寤寐思服允符淑女之求知
家道之攸宜底親心之克順式涓穀旦丕稱椒塗祗室
禕褕相禮聿嚴于宗祀寢門筭總承顏永燕于慈闈某
蒙被光華遭逢休慶風天下而正夫婦但宣化于闈睢
言后妃之多子孫請讀詩于螽羽

賀皇后上尊號表

中闡正位新翟蓋之來朝慈極承顏託鴻名之歸美宮
庭闈懌益壤洽和恭惟皇后殿下並日之明承天以順
相虞克孝上高媯汭之風嗣任徽音仰率周京之範佐
璪旒而致養鏤寶冊以推尊彤管重光青蒲多喜某屬
將隆指欣覩崇儀請祝多男益介含飴之樂踰呼萬歲
永承佐餽之歡

賀誕皇孫表

君天下而謂之子仰承眷顧之休受帝祉而施于孫載
啓誕彌之慶事闕宗社喜動宮闈竊以綿三世蕃衍之
期開千齡希闊之會命分青蓋方茲盡侍膳之歡慶衍
綠車有以助含飴之樂于今親見自昔罕聞恭惟皇帝
陛下受命溥將躋民仁壽泰山勢定鞏鴻祚于無疆豐
水源深詒燕謀于有永對越三五之盛導迎千億之祥
某服在遐陬欣逢勝事本支百世願歌周雅之詩福祿
萬年敢上堯封之祝

賀皇后誕皇孫表

德懋長秋夙尊母道陽居大夏載毓孫枝宗祏安強宮
闡閭懌恭惟皇后殿下承天厚載嗣古徽音志輔皇圖
有助燕謀之永慶延朱邸式開熊夢之祥無疆惟休有
室大競某遠馳牡轡阻拜駕行呼嵩嶽者三喻想兩宮
之喜採周南之什請揚多子之詩

明堂慶成表二首

明堂九筵備成熙事皇極五福敷錫庶民天人和同華

夏閏懌恭惟皇帝陛下纂承令緒統輯羣元至治馨香
丕格神明之感太平持守於昭祖考之寧因萬寶之登
秋飭四圭之歲祀房心光動箕翼慶延其欣際上儀屬
縻遠使駿奔秉德阻陪執豆之恭虎拜揚休諭想奉卮
之盛

天臨重帟肇舉明禋日次大房迄成熙事穹垠賴慶溥
率均驩恭惟皇帝陛下克秉小心祇承丕緒成順致利
天人允極于和同持盈守成祖考式同於和樂懋積惟

馨之德庸將我享之誠對越三靈斂時百福某心馳右
个身繫左符在洛駿奔悵莫倍于周豆呼嵩鰲抃想交
奉于漢觴

鈐轄司賀壽表

十月聚東井之星祥開流渚萬年祝南山之壽聲震呼
嵩啓聖休期溥海善頌恭惟皇帝陛下至仁是寶無逸
為箴修德以來遠人四方其訓建極以成天慶九叙惟
歌哀時甚盛之休介以無疆之奠臣遠分郡紱猥總戎

鈐請壽聖人何假玉杯之刻乃心王室切懷金鑑之陳
瑞慶節提刑賀表

誕彌厥月日躔析木之津於萬斯年天啓猗蘭之慶千
秋紀節諸夏均驩恭惟皇帝陛下受命溥將治民祗懼
延洪周歷過成誦之卜年嘉靖殷邦遇高宗之享國既
多受祉其永無疆臣忻際虹流阻陪虎拜神人致喜隄
隨嵩嶽之呼瑞慶大來擬勒浯溪之頌

贛州賀表

十月建亥稱萬歲之玉卮衆星拱辰上千秋之金鑑乾
坤錫祉華夏均歡恭惟皇帝陛下嗣服無疆繼明久照
顯顯令德勤于邦儉于家翼翼小心雖在宮肅在廟昭
假穹崇之監茂迎平格之祥臣遠想虹流阻陪虎拜海
隅日出忻逢休運之亨嘉壽域天開願紀中興之瑞慶

謝轉官表

明刑將指退省無庸進律示褒驟蒙疏渥既寬謬責又
玷榮光臣惟賞不以勞其名為僭取非其分厥咎傷廉

矧方引疾以祈閑顧使罔功而受爵涉欺要利懼難解
于人言假寵及私恐亦累于國體固嫌方命焉敢匿情
伏地失言回天無力勿云一秩名器重于丘山乃至三
辭命令堅如金石拜恩難荷顧義終慚伏念臣初乏寸
長偶逃百謫俗安拙政率循朝廷條教之常盜息豐年
仰賴聖明威德之被如臣何力而賚以官茲益伏遇皇
帝陛下徧覆不殊容光必照視遐陬如戶庭之近于使
選以惟精借殊恩為原隰之華欲民庸之知厲故茲謏

薄有比超逾臣敢不祗服訓辭勉圖報效有功見知則
說敢憚周咨投閒乃分之宜終期得請

廣東經畧到任謝表

乘輶奏績畢爪戍以懷歸分閫疏榮捧芝函而增惕躡
寓圖書之直有華鏡吹之行地重望輕亟騰遜牘天高
聽邈竟閱俞音隄嶺眠章撫封問俗維今廣鎮宅牧南
郊內柔戎服之小侯外輯卉裳之諸國俗龐以獷吏雜
而饗蕃宣不可以非人選擇常重于他鎮如臣者稟資

拙鈍際世休明受國厚恩每念疲駑之自竭傳家有訓
粗知清白之不移違軒陛者五年玷江南之兩節盡心
折獄可裨欽恤之勤忤俗成仇浸覺愆尤之積踐更近
只幽黜宜然驟蒙帥鉞之除孰誤宸旒之聽念先臣發
軔百年曷愜于去思而伯氏覆車衆目方覘于來効冒
當隆委彌震危衷茲益伏遇皇帝陛下徧覆不殊容光
必照謂臣馳驅之外固熟知田里愁恨之情察臣簡靜
無華或能集嶺海清夷之效俾承人之用課民庸臣敢

不祇命十行敬威咫尺簡節疎目庶幾氓庶之奠居自
葉流根敢謂京師之蒙潤少酬恩施即丐身閑

廣州謝賜歷日表

太歲在申定清臺之密課三日先甲賜方國之細書前
民用以布宣新海隅之視聽恭惟皇帝陛下膺堯歷數
察舜璣衡先天而天不違妙輔相裁成之道底日而日
不失示耕耘收斂之期誕告庶邦共循常憲臣恭承頒
朔奉職宅南雨足一犁當盡心於勸課日運百甓誓自

力於馳驅

南安知軍到任謝表

謏材佐牧媿治狀之無聞遠壘承流拜除書而過望隆
恩弗稱責重難勝伏念臣質窳弗張學卑莫抗少而涉
世妄事驅馳長乃服官負慚玩愒偶無傷于製錦因冒
寵于題輿百謫未盈兩年何補及瓜受代夢方繞于刀
頭剖竹分符命遄驅于嶺趾之官僅三舍而近需次無
一日之淹使自為謀殆無過此無能為役曷濟登茲財

既竭而源窮民久疲而習玩欲襦袴之自得且桴鼓之
不鳴其在撫循若為稱塞茲益伏遇皇帝陛下明無私
照仁不遐遺謂臣仕在鄰封必熟知其習尚察臣政無
崖異庶相與以便安遂以撫摩責之庸朽臣敢不敬威
咫尺報効毫分輯渤海犢佩之遺尚專靜理緩晉陽繭
絲之取願布寬恩

欽定四庫全書

漁野類稿卷二

宋 陳元晉 撰

啟

上魏左史了翁啟

長安三月懷漫刺以誰從柱史一星燦寒芒之可敬曳
裾伊始銜袖謂何誠念狂瀾既倒之秋正有小草相依
之志心乎考德辭以見情竊惟人物議論之污隆寔繫
天下國家之理亂上無禮下無學識者懼賊民之興大

犯義小犯刑終然非有國之福試觀近歲甚可寒心前
輩浸以彫零後生無所則仰善類之勢不合付之乍佞
以乍賢正論之脈僅存聽其自鳴而自息以奔趨為捷
徑以軟熟為圓機諂笑伊嚶豈勝夏畦之病醉夢顛倒
無復夜氣之存習成脂韋病入骨髓設有變色動容之
警孰為仗節死誼之人憚林甫不一鳴何以責其抗祿
山之暴見董賢輒下拜終乃折而為新室之從長此安
窮誰歟特立少壯東方縉紳之氣方賴西州領袖之儒

恭惟國史左史學邃道充氣閑宇足古今貫穿孰量曾
中九雲夢之藏名德穹崇自是魁下三台星之望然且
晦才華而不有遺科級以若無尚友古人潛心大業會
同蜀洛上通洙泗之一源凌厲莊騷下掩淵雲之衆作
厥脩孔碩所立最高平生榮進之何心出處從容之以
道惟是衆人之皆醉幾于一國之若狂英俊並游或相
漸而改度名義至重不少貶以求榮抗危言于羣情嬉
玩之時効忠益于萬口唯阿之際雖捧土障江河之決

事有至難然高標凌霜雪之嚴人方共敬能令趙氏九鼎之重端在魏公一鑑之明高廟神靈天王明聖是應任天下之重庶幾回世道之趨如某者洛誦之孫冰氏之子雖它材之苦短徒此念之好脩人不堪其憂何敢改賤貧之素善者彊而附殆不勝饑渴之懷偶緣脫選調之階乃來作京華之客貴人不喜生語耿懷抱之誰論先生獨抱古心凜典刑之固在輒修向來一瓣香之敬或察下有千歲苓之情不介而前惟公斯可每伏高

文而晝誦夜夢見之儻令斯道之朝聞夕死可矣

上廣東何憲使啟

受部刺史之容幸及終於齊戍脩鄉先生之敬盍求附
於韓門方輕舟戒吳會之趨宜櫺劔肅海瀕之拜以辭
見意因謝有祈竊以漢人尊許劭之評推為清鑒唐士
得蘇公之顧輒號聞人蓋公莫公於鄉曲之推揚而重
莫重於監司之題品居下位不獲乎上何以取名有先
達者為之前宜其託重有如不肖獲事大賢哦松竹之

廳自媿三年之負泛芙蓉之幕每虞百謫之盈不圖英
蕩之來便假粉榆之蔭麻原第三谷認汝水之同流南
豐一瓣香許後山之為役幘幪蔚若梯接溫如猶記七
年之前曾蓬仞牆之下諸從事之斂板獨出賞音一男
子之上書莫欺公聽遂令強弩之末偶及大刀之頭將
渡梅關歸誇梓里小人屬饜而已它復何由大鈞塊北
無垠尤難自外蓋既託萬間之庇乃弗干一字之褒是
甘為匠石之棄材如親到寶山而束手時非不偶人謂

斯何蟠木無先容不自知其冒昧小草有遠志儻或辱
於收憐茲蓋伏遇某官筆挾風雷骨分涇渭貪吏解印
綬豐年銷螟蟻之災大刑用甲兵荒嶠靜猩鼯之嘯已
課澄清之最益躬吐握之勞誠知勩相於國家要在旁
招於俊乂崇成大厦固非一木之支宏濟巨川端自烝
徒之楫宜令弱植願累明敷鄉人善者好之當不辱西
江之派我客見有此否尚容陪東閣之觀

通交代黃縣丞啟

同寮異事曩均兄弟之情再轉為丞又締子孫之好方
期候問忽辱先施顧小人不敏以胡顏幸賢者鼎來而
欲舞恭惟某官蜚聲月旦濶步雲梯翔鳳騰蛟吐詞華
而有爛剗犀斷兕奏才刃以無前自題淡墨之名合快
飛黃之步栖遲東野不辭射鴨之寒盤礴南圖方鼓搏
鷓之勇未讀崔藍田廳壁之記更賦韓昌黎增江之詩
雙陸之勢無休九萬之程斯下某偶揚前批甚負哦松
不圖交事之榮乃得常寮之舊相視而笑重尋握手之

清談願疾其驅日候浮關之紫氣

通史尚書啟

試縣令之冠獲游珂里望尚書之履行詣滄州以半生
切執御之懷迺一旦有登門之幸天涯作客方繞烏鵲
之枝湖上拜公願借龜魚之蔭三熏起敬尺牘陳情恭
惟某官文章巨公禮樂先進名父子之濟美綠竹猗猗
難兄弟之齊芳棣華韡韡徧儀膺仕綽著英聲奉使典
州半天下經行之跡出藩入從大丈夫得志之為宜踐

樓臺鼎鼐之榮式慰簡冊墳箎之美而乃賓靈園於閒
館友狂客於四明笞鳳鞭鸞自適散仙之趣踞龜食蛤
方尋若士之期如安石之東山如溫公之西洛此其用
意高甚當於前輩求之煙際鳴榔良似孤舟之橫水日
邊有詔是須八柱之承天豈容袖手而旁觀正恐捉鼻
之不免某冰氏之子洛誦之孫虞卿窮而著書自分作
千年之計尹何愿而為邑固知無百里之材矧是奉川
大非曩日賦竭而斂益急焉取其餘籍去而賦亦逃莫

供所出虛額盡通於實數新輸不補於舊逋殆幾巧婦
之空廚難責癡兒之了事不量可笑汔濟謂何正懷折
腰為米之羞又坐開口言錢之迫冒然當此誰知憐之
有朋來遠方正願備老聃之役大厦庇天下矧近在鄭
公之鄉

見檢正余侍郎啟

海邦試令辱依節使之光京國抗塵願揖侍郎之貴輒
以畸涼之跡寫之耦儷之詞起敬三熏希恩一顧伏念

某身勤事左意廣才疎辱諸老之誤知偶七階之脫選
操刀製錦曾不為擇地之謀點鐵成金顧欲易奉川之
俗方追尤於失策迺有幸以受容過珂里而登龍門極
蒙與潔持庾節而驅牡轡正倚包荒事有當為請無不
獲惟是姦豪之恣肆加之板籍之散亡官府陵夷田閭
乾涸非力為之整頓將不可以支撐請命郡侯既蠲三
萬緡虛催之賦究心簿正遂革數十年走弄之姦宿蠹
稍清衆狙已怒自覺方心之難鑿不知強項之為非水

清遑卹於無魚市衆俄傳於有虎譽浮謗集罪大罰輕
幸逃不獲乎上之愆亦免得罪於民之咎妻其成錦甘
也如飴奪邑有名已分飯蔬而沒齒歸田無策未忘斗
米之折腰適虔南羣盜之嘯呼而江右諸司之舉辟自
詭王尊之勇皆嗤虞詡之衰手闢草萊眼空篋竹甫一
雷之成聚未數月而賦歸知何取嫉於諸公殆欲錮人
於聖世下惠三黜祇為直道之羞禹錫九年敢作大鈞
之問笑功名之昨夢負道德之初心搔首踟躕分兩鬢

其已雪解衣盤礴休百念以俱氷倏逢天日之清明一
洗山林之悽愴有諧人者已為魑魅之投彼君子兮盡
作闕庭之集爭出犯嚴之口望公引類之心揚善推能
棄瑕使過時哉難得其如貧女之無媒仕乎為貧矧是
小人之有母必有能誦子虛之賦庶幾可上光範之書
舊時堂燕之重來正切捲簾之望明月林烏之三匝幸
憐繞樹之情恭惟某官峻稟扶輿清儲沆瀣聰明精銳
淨冰雪而走雷霆翰墨詞章引星辰而決河漢頃當驪

共雜處之日獨堅夷齊不易之心人莫得而磷緇天亦
知其忠赤及更大政遄立要津彌縫造化之工迺續國
家之脈當江濤如此之際為烝徒楫之之思潤物之澤
無聲既優既渥推轂之言有味不進不休凡今傅羽翼
而飛誰不借齒牙之助小草有遠志肯令見棄於榛菅
蟠木無先容儻許兼收於榱桷噓枯有待忍恥自鳴特
從容過閣之片言即邂逅沖霄之良便惟夫子知我官
豈以洵故冗耶使相國禮之士賢於隗者至矣

見鄭參政啟

肅拜魁躔尚記門牆之舊參陪樞極適逢鼎鼎之新輒
修燕雀賀厦之誠庸寓蟋蟀鳴秋之志三熏染牘一顧
希榮恭惟某官經德不回誠身有道唐虞致主執心期
於臯夔稷契之間孔孟為師尋統緒於周程朱張之後
議論粹乎大正出處炯其無瑕一去觚稜四分牙齷齪西
風庾公之塵起不受人污東海蕭傅之名高屢勤帝問
自簡主知之異少安天定之期偶乾清而坤夷慶泰來

而否徃曾未解絃之幾日已頒名璽於九天盍歸乎來
庸正魁台之望何見之晚式寬霖雨之思暫居陽城諫
議之官畧吐宣公仁義之論政不足適人不足問首務
格非心欲先正身欲先修何難圖治此正古大臣之事
允當明天子之心亟命宗工晉參宥府有常立武方將
取亂以侮亡無競維人尤在折衝而強本若知彼不明
於知己恐所憂反重於所欣寔賴同心同德之臣亟合
羣策羣力之助收草茅之公論而用之邦國推槐棘之

和氣而散諸閭閻邦其永孚于休公有無窮之聞伏念
某才誠無似命寔不猶為斗米以折腰姑逭歸田之計
甘飯蔬而沒齒竟罹奪邑之愆回思強項之昨非宜有
吹毛之後禍正琴客負租之罪黠者癡之排大慈伐木
之謀醒而狂矣城狐側目市虎興訛諸公料丞相之嗔
欲錮之於聖世萬事付小兒之戲分安此以終身適當
路之興憐俾出山而效使時方患盜義敢顧私叱馭不
辭王尊乃勇盤根自詭虞詡何衰龍蛇驅而放之菹鴻

鴈飛而集于澤既成新邑莫掩宿愆顧指為病顙之駒
又彈及傷弓之鳥柳惠三黜祇為直道之羞禹錫九年
懶作大鈞之問時哉更化賢者聚朝連茹拔茅未能忘
小草之志析薪匪斧誰能為蟠木之容雅聞嚴徐之奮
飛多出崔李之交說非親非故儻矜強附善之情立已
立人是在一轉鈞之力敢蘄噓拂俾遂驅馳天下官豈
以洵故冗耶食之升斗海內士賢於隗者至矣侈彼鼎
彝

通知潭州李參政啟

皇咨碩輔宅牧价藩泰階六符下委星沙之照元戎十
乘內通月殿之班樂只受容斐然奏記恭惟某官高明
而縝栗碩大而裕和望太白橫岷峨高眼一空於四海
暴秋陽濯江漢誠心對越於兩間早以西州領袖之英
立乎東方縉紳之表誕膺宁眷峻陟臺端剛方不懾於
雷霆清切徑躋於台斗殫朝夕論思之益非道不陳運
夙夜宥密之籌知微之顯出任保釐之寄入陪駿假之

聯柄本五兵勢隆九鼎文武萬邦之為憲精神千里之
折衝帝念三相實作十數連城之蔽時方多事暫煩二
三執政之行上流張待哺之頤內地剜醫瘡之肉公窘
私罄表弱中乾城復于隍當植久安之勢戎伏于莽盍
思不見之圖輟帷幄之重臣寬冕旒之遠顧畧沛傳巖
之雨亟開衡嶽之雲何回旋不足之疑見北垞無垠之
大有安社稷臣者固傳張紫巖開濟之心無以我公歸
兮定繼李忠定登庸之轍某單平末學孤陋餘生坐違

汗漫之期謾逐侏儒之飽自笑豚蹄所持之狹初無驥
足可展之長隨千羣棲柏之烏記曾下南床之拜顧三
匝繞枝之鵲乃今諧東閣之規慚佐岳之非才倚如山
之大庇望幢牙之戾止折屐齒以欣如登元禮之門亦
願備采椽樽櫨之數題仲子之坐敢徒事山水泉石之
娛

通安樞帥啓

泰階六符正委星沙之照衡山千里將諧巖石之瞻喜

承大府約束之嚴僭布小夫竿牘之敬恭惟某官姿兼
將相名震要荒邦之桀兮邦之特兮聖之和者聖之任
者曩戎馬方虞於南牧嗟杜鵑不見於西川所守匪親
化為豺狼蕩無彛典無禮於君逐如鳥雀孰厲忠誠大
厦幾傾羣情並悚不借蚍蜉蟻子之援爰拯魚鳧蠶叢
之危悖於太陽掃欃槍而盡北沔彼流水回江漢以朝
東胡為考父之循牆猶屑召公之分陝天或者啟中興
之運公惠然帥上流之師失河北踰六十年難茹以漢

和我之恥領湖南凡二千里當印亡秦必楚之言風景
不殊江濤如此以時言之可矣如公非其人乎然貂蟬
之出兜鍪固當了掛旆天山之事第蟣虱之生介冑豈
應勞運籌帷幄之臣行端委於廟堂坐指麾於豪傑使
兩戒山河之復合將萬年宗社以長延如前輩之接引
後生以大賢而矜嘉不肖言提其耳實獲我心冒然此
來恃此無恐獻梅花之賦何敢干題品之私讀桂林之
書惟欲托涵容之度

通柴大監啟

榮分銅虎作鎮玉虹圖書分東壁之躔榮光下燭旌纛
指南虔之境仁氣先驅瞻言千騎之來諭贄雙麟之敬
恭惟某官力行正學獨抱古心論不詭於聖人師友孔
孟達可行於天下妾婦儀秦自其疑然於庠序之時已
知可以為社稷之器曩羣邪之醜正幾一國之皆狂士
操入室之戈公屹中流之柱逮解弦而更化乃束帶而
立朝義不苟同亟乘一障而去効已多試薦煩六轡之

驅再入脩門徧儀要路嘉謀告后無隱情惜已之風正
色在庭有強木折衝之助合晉陪於豹尾顧出守於虎
頭萬牛挽而首不回公固榮於勇退六鰲去而山為動
帝豈吝於留行意謂章貢二水之交令佩兵民二組之
寄風聲險健尚資長德之薰陶山谷翳荒暫借重名之
彈壓徒得居重母俾民憂即歸排閭闔之雲豈久對崆
峒之日某勾朱冗役副墨謏聞臺府抗塵兩載偶逃於
百謫師儒並世片言勝讀於十年有幸受容滿祈與潔

望幢牙之戾止折屐齒以欣如敬脩向來一瓣香之誠
容致下有千歲苓之請短簿能令公喜雖無可効之長
才大守不可私干當厲相依之遠志

通慶元齊守啟

油幢蕩節夙瞻霄漢之躔墨綬銅章行隸塵埃之役束
身受教斂衽陳詞恭惟某官高明有融卓犖為傑操刀
必割四顧而無全牛振鬣長鳴一洗而空凡馬蜚聲雋
軌策足榮塗既疇別駕之庸遄簡凝旒之聽以煩駿望

出剖菟符天台四明繼顓登陸之勝扶風馮翊蔚為輔
郡之優重勞制閭之保釐仍借皇華之咨度戈船不試
環瀚海以無波絲轡載馳布陽春而有脚民功甚偉物
望采高自葉流根京師蒙九里之潤匪朝伊夕刺史即
三公之除某鹿鹿一科魚魚百拙乍違選甯冒求試於
邑灘所學農書惜未傳於縣譜自知甚審可笑不量幸
天惠於仁侯將日依於德庇三沐欣投於足下萬間真
見於眼前抑惟保障乎願奉行簡子之政聊欲絃歌耳

敢妄希元亮之高

通霄都徐宰啟

鳴子賤之琴剽先聲而起敬祭孫賓之竈徼後福以知
歸大夫賢者之鼎來小子斐然而申問恭惟某官世濟
其美父教之忠金莖承露之高離風塵而獨潔玉斧脩
月之巧肖天秀以成章由拾芥以取青洵泛蓮而依綠
依流平進謂當觀翻藥之階取勢斜飛亦宜校吹藜之
館胡為雞肋又枉牛刀公不鄙夷子男之邦民可屬饜

父母之惠輿人交口以稱慶和氣有脚而先驅若早望
雲以日為歲某冒茲供簿昉此綬章低頭枳棘之棲着
儒冠而羞甚側耳松桂之詠傳仙舄之跼然適邂逅於
依歸孰畀矜於幸會亟承記室仰候浮關自今短主簿
之不才則從其長寔恃新令尹之易事無斁於人

通崇仁舒宰啟

仰名山柯斧之高無絲掃舍撫窮巷席門之陋有幸受
屢將拜下於飛鳧敢恭先於疊壘恭惟某官懷才膚敏

執德靖共廩焉喬木之故家展也盤根之利器為柱下
史遺直尚想於祖風讀春陵行能仕定遵於父教僉曰
舊羶之當復胡然故笏之未求蠖由屈以求伸鳳升高
而自下暫紆墨綬來撫黃洲雖子男之職徒勞大為斂
惠然父母之邦何幸得遂依仁歡然小邑之寡民樂只
大夫之賢者所憂斗郡尚費刃游縣罄之室相望數畧
之池已竭好出袖間之手為寬眼下之瘡逆知妙解於
全牛更請疾驅於都騎某甫遲齊戍屢共戎談欲緣孺

子以納交恰際家君之作宰居是邦也適我願兮奚為
於丘之門將有大廈萬間之托未至於偃之室恨無清
水一盃之規

通崇仁舒宰啟

是邦大夫之來不遠千里諸侯寓公之託願受一塵近
只行旌斐然削牘恭惟某官世濟其美族大而才芝蘭
玉樹之佳梧竹瑤環之秀僉曰公侯之必復胡然州縣
之徒勞萬斛龍驤乃依流而平進九霄鵬翮顧取勢以

斜飛纔畢素冠復紆墨綬家傳清白定知馬骨之高政
拙催科共徯繭絲之緩毋憚六月之暑來尉一雷之恩
第恐壘追不俟符合某方遲齊戍屢接戎談已知兒稱
其家莫非父教之仕昔有生子如仲謀之歎今哦有客
依劉表之詩平生所願識魯山獲脩桑敬公事未嘗至
偃室惟假棠陰

通應經畧純之啟

丹詔起家碧幢分閫直河洛圖書之邃天不違顏殿番

禹軍府之雄春來有脚先聲動悟衆望昭蘇自李唐至於本朝惟廣帥重於它鎮况邊方多事宜却顧於本根而天下一身本相關於動息苟泄邇而忘遠或重北而輕南變必伏於所偏慮盍先於未著贛民走利聚則寇攘徭俗喜爭饑而挽裂最是配隸克頑之卒散諸山谷荒翳之區攫金晝行探丸夜動凜包藏之叵測恬護養以謂何至於官竊而饗吏強而黠所養非所用兵秦逸以成驕敢怒不敢言民茹冤而何籲設有風塵之警恐

為豪傑之資青齊出師使不作盧循道覆之慮蕭牆生
敵又何暇季氏顓臾之謀我儀圖之誰與領此恭惟某
官肝膽一劍精神五兵載華嶽繫星辰聖之任者噓海
岱出雲雨邦之桀兮某無緣讀書不習為吏饑來驅我
謾思嚙嚼於斗升拙亦宜然敢望躋攀於分寸茲投畀
箠楚塵埃之底將疇依帡幪風雨之休栖栖法曹足下
儻容於三沐潭潭公府眼前真見於萬間

通沈提幹啟

對敷新命贊畫崇臺君遣使之皇皇莫重綉衣之寄筵
得賓而秩秩預知丹筆之平行李鼎來遐萌胥賀伏惟
某官才猷孔碩文獻甚都垂玉衡於清秋孤騫物表挹
金莖之寒露迴絕風塵仕而學以俱優官所居而隨治
笑渠泛幕有裨坐嘯之高松桂讀書益廣弦歌之愛合
入依於日轂猶出佐於星軺何敬非刑惟明克允吏屈
聽訟之力聞王文公記處學之辭民蒙珥筆之聲見黃
太史賦江西之語沆憲條之清簡後使介之仁賢拄笏

春容聊寄風騷於翠玉影纓凌厲行催步武之丹青某
學不踰人饑來驅我出朱入墨只堪祭竈之卑泛綠依
紅大似代庖之僭行且返屠羊之肆然近依繞鵲之枝
倘疾其驅獲快披雲之覩尚終所誨俾聞捲霧之譚

膳錄監生臣李光緒

膳錄監生臣陳昶